

Na osnovu člana 4. stav 2., člana 13., člana 52. i člana 64. Zakon o cestama Federacije BiH ("Službene novine Federacije BiH", broj 12/10, 16/10 - ispravka i 66/13), člana 8. i 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", br. 49/06 i 51/09), člana 10. i 68. Statuta Općine Centar Sarajevo – prečišćeni tekst ("Službene novine Kantona Sarajevo", broj: 23/04), Općinsko vijeće Centar Sarajevo je na Devetoj redovnoj sjednici održanoj dana 30.09. 2021. godine utvrdilo

N A C R T

O D L U K E

o prokopavanju saobraćajnica na području Općine Centar Sarajevo

I – OPĆE ODREDBE

Član 1.

Ovom Odlukom uređuju se uslovi i način prokopavanja lokalnih i nerazvrstanih cesta na području Općine Centar Sarajevo čiji je upravitelj Općina Centar Sarajevo, u svrhu polaganja novih ili zamjene i opravke postojećih podzemnih instalacija a sve u cilju zaštite tih površina.

Član 2.

Prokopavanjem u smislu odredaba ove Odluke podrazumijeva se svaki zahvat u cestovnom i zaštitnom cestovnom pojasu lokalnih i nerazvrstanih cesta na području Općine Centar Sarajevo, a koji se vrši za izgradnju komunalnih objekata i uređaja kao i radi polaganja novih, zamjene, opravke ili uklanjanja postojećih podzemnih instalacija.

Član 3.

Saobraćajne površine čiji je nadležni upravitelj ceste Općina čine:

- lokalne ceste,
- saobraćajnice u naselju,
- nerazvrstane ceste.

Član 4.

Lokalne ceste kojima upravlja Općina utvrđene su u članu 3. Odluke o razvrstavanju lokalnih cesta i ulica u gradu Sarajevu na području Općine Centar Sarajevo, Novi Grad Sarajevo, Novo Sarajevo i Stari Grad Sarajevo ("Službene novine Kantona Sarajevo", broj 40/14).

Nerazvrstana cesta je svaka površina koja se koristi za saobraćaj po bilo kojoj osnovi i koja je pristupačna većem broju korisnika. Nerazvrstana cesta kojom upravlja Općina, smatra se svaka ulica na njenoj teritoriji koja u smislu odredbi Zakona o cestama Federacije BiH

("Službene novine Federacije BiH", broj 12/10, 16/10 - ispravka i 66/13) nije kategorisana kao javna cesta.

II – USLOVI I POSTUPAK PROKOPAVANJA

Član 5.

Prokopavanje se vrši na osnovu odobrenja općinske službe nadležne za poslove iz komunalne oblasti (u daljem tekstu: općinska služba).

Odobrenje za prokopavanje može se izdati samo vlasniku podzemnih instalacija.

Vlasnik instalacija za potrebe izvođenje radova na prokopavanju može putem ugovora angažovati registrovano i specijalizovano pravno lice da u njegovo ime i za njegov račun izvede potrebne radove.

Uz zahtjev za izdavanje odobrenja za prokopavanje potrebno je priložiti:

- Kopiju katastarskog plana,
- Katastar podzemnih instalacija, sa ucrtanom novom trasom instalacija ili postojećom trasom na kojoj se vrši intervencija,
- Odobrenje za građenje (za slučajeve u kojima odobrenje za građenje treba prethodno pribaviti) odnosno dostaviti urbanističku saglasnost i dokaz o utvrđenom pravu služnosti (za slučajeve u kojima nije potrebno pribaviti odobrenje za građenje)
- Pismena narudžba firme sa kojom je zaključen ugovor o sanaciji prokopa.

Član 6.

Odobrenjem za prokopavanje utvrđuje se:

- Vlasnik radova,
- Period prokopavanja u kojem je izvođač radova dužan sanirati kvar i dovesti prokopanu površinu u prvobitno stanje,
- lokacija-trasa prokopavanja,
- tehnički uslovi za prokopavanje i zatvaranje prokopanih površina,
- prometni uslovi- režim saobraćaja (ukoliko radovi na prokopavanju zahtijevaju povremene obustave ili izmjenu režima saobraćaja potrebno je prethodno pribaviti rješenje Ministarstva za izmjenu režima saobraćaja).

Član 7.

Radovi na prokopavanju dozvoljeni su u periodu od 1. aprila do 1. novembra tekuće godine.

Izuzetno od odredbe prethodnog stava, a u cilju hitnih opravki na podzemnim instalacijama, prokopavanje se može vršiti tokom cijele godine na osnovu polugodišnjeg odobrenja kojeg izdaje općinska služba.

Ukoliko se radovi na prokopavanju ne završe do roka utvrđenog u stavu 1.ovog člana, održavanje prokopanih površina u toku zimskog perioda od 01.novembra do 1. aprila je obavezno na način:

- ugradnjom hladnog asfalta,
- betoniranjem prokopane površine,
- dopunom tamponskim materijalom (sitna frakcija),

Navedenom radovima se vrši privremena sanacija prokopanih površina dok se ne steknu vremenski uslovi kada će se izvršiti sanacija prokopanih površina prema „Tehničkim uslovima za prokopavanje i zatvaranje prokopanih javnih površina na području Kantona Sarajevo“ ("Službene novine Kantona Sarajevo", broj 10/09).

Član 8.

Vlasnik podzemnih instalacija u svakom konkretnom slučaju, a po pribavljenom odobrenju za prokop koji nije hitna intervencija, je dužan da u roku od 24 sata prije početka samih radova, obavijesti općinsku inspekciju i Ministarstvo unutrašnjih poslova Kantona Sarajevo.

Član 9.

Pri prokopavanju i dovođenju prokopanih površina u prvobitno i tehnički ispravno stanje, izvođač radova i vlasnik instalacija su dužni da se pridržavaju uslova propisanih u „Tehničkim uslovima za prokopavanje i zatvaranje prokopanih javnih površina na području Kantona Sarajevo“ ("Službene novine Kantona Sarajevo", broj 10/09).

Član 10.

Prilikom radova prokopavanja, izvođač je dužan izvršiti sve propisane mjere zaštite na radu i odgovarajuće mjere zaštite prolaznika i ostalih učesnika u saobraćaju, te postaviti odgovarajuću saobraćajnu signalizaciju na način da se ne ometa i ugrožava javni saobraćaj.

Član 11.

Ukoliko radovi na prokopavanju zahtijevaju povremene obustave ili izmjenu režima saobraćaja, po dobivanju odobrenja za prokop od strane općinske službe, a prije samog početka izvođenja radova, potrebno je pribaviti i odobrenje za izmjenu režima saobraćaja od strane Ministarstva saobraćaja Kantona Sarajevo.

Član 12.

Prilikom izvođenja radova na prokopavanju potrebno je na tehnički adekvatan način zaštititi postojeće instalacije te obavijestiti i ostale vlasnike instalacija o izvođenju radova, a sve eventualne štete na istima, vlasnik podzemnih instalacija je dužan nadoknaditi o vlastitom trošku.

Kada se usljed izvođenja radova ošteti saobraćajna površina koja nije bila obuhvaćena odobrenjem o prokopu, njeno dovođenje u prvobitno i tehnički ispravno stanje vrši se pod istim uslovima i na način propisan za površinu koja je bila predmetom prokopavanja.

Član 13.

Izvođač radova je dužan prokopane površine dovesti u prvobitno stanje u roku određenom u odobrenju za prokopavanje.

Pri prokopavanju u svrhu opravke postojećih podzemnih instalacija izvođač radova je dužan da prokopane površine dovede u prvobitno ispravno stanje, a prema tehničkim uslovima u roku od 72 sata od dana sanacije kvara na podzemnim instalacijama.

Zabranjeno je zatvaranje prokopanih površina prije izvršenog snimanja podzemnih instalacija čije snimanje je obavezno prema odredbama Zakona o katastru komunalnih uređaja.

Snimanje podzemnih instalacija mora se obaviti u roku od 24 sata od završetka polaganja instalacija.

Organ nadležan za izdavanje odobrenja za prokopavanje, u slučaju da vlasnik podzemnih instalacija u roku od 72 sata od dana sanacije kvara na podzemnoj instalaciji ne dovede prokopanu površinu u tehnički ispravno stanje, izdaće nalog ovlaštenoj firmi registrovanoj za tu vrstu djelatnosti, da prokopanu površinu dovede u prvobitno ispravno stanje o trošku vlasnika podzemnih instalacija.

Član 14.

Oštećenja na stambenim, poslovnim i drugim objektima, te saobraćajnim površinama, nastala usljed radova prokopavanja, dužani je sanirati vlasnik podzemnih instalacija.

Član 15.

Vlasnik podzemnih instalacija je obavezan da vodi evidenciju svih prokopa koji predstavljaju hitnu intervenciju, te je istu dužan dostavljati općinskoj službi.

O svakoj hitnoj intervenciji radi otklanjanja kvarova, vlasnik podzemnih instalacija je dužan da odmah obavijesti općinsku službu za upravu nadležnu za inspekcijske poslove (u daljem tekstu: općinska inspekcija), a najkasnije u roku od 24 sata ili narednog radnog dana, računajući od momenta saznanja za kvar, te da navede razloge iz kojih se nedvojbeno cijeni da je u svakom konkretnom slučaju hitnost u postupanju bila opravdana.

Član 16.

Odobrenje o prokopu radi hitnih intervencija za naredni polugodišnji period, vlasniku podzemnih instalacija će se produžiti, samo ukoliko su sve prokopane površine u prethodnom polugodišnjem periodu dovedene u prvobitno i tehnički ispravno stanje, a što se dokazuje pismenim izvještajem općinske inspekcije.

Član 17.

U slučaju da se radovi na prokopavanju otpočinu izvoditi bez potrebnog odobrenja, postupajući cestovni, odnosno komunalni inspektor, svaki u okvirima svoje nadležnosti, rješenjem će naložiti da se započeti radovi obustave, te će se odrediti rok za pribavljanje odobrenja, koji ne može biti duži od 8 dana.

Ukoliko vlasnik podzemnih instalacija ne obustavi radove na prokopavanju i u ostavljenom roku ne pribavi potrebno odobrenje, postupajući inspektor rješenjem će naložiti da prokopanu površinu vrati u prvobitno i tehnički ispravno stanje.

Član 18.

Kada inspektor u vršenju inspekcijskog nadzora, neposrednim opažanjem uoči oštećenja na saobraćajnoj površini uzrokovana prokopavanjem saobraćajnice, rješenjem će naložiti vlasniku instalacija da najkasnije u roku od 72 sata, računajući od dana prijema rješenja, pristupi radovima na dovođenju saobraćajnice u prvobitno stanje.

Član 19.

Izgrađene, rekonstruisane i sanirane saobraćajne površine ne mogu biti predmetom prokopavanja prije isteka perioda od 2 godine, računajući od dana završetka radova, osim u slijedećim slučajevima:

- u slučaju kvara ili dejstva vanredne situacije, kada je neophodno otkloniti posljedice koje predstavljaju potencijalnu opasnost po život i zdravlje ljudi, materijalna dobra i bezbjednost saobraćaja,
- ukoliko vlasnik podzemnih instalacija prihvati obavezu da izvrši sveobuhvatnu sanaciju saobraćajne površine koja je bila predmetom prokopavanja, u njenoj cijeloj dužini i širini (čije uslove propisuje upravitelj ceste u odobrenju) .

Radovi na infrastrukturi na površini unutar perioda iz stava 1. ovog člana izvode se podbušivanjem.

Član 20.

Za izvedene radove na dovođenju prokopane saobraćajne površine u prvobitno i tehnički ispravno stanje, vlasnik podzemnih instalacija garantuje u periodu od 2 godine od dana završetka radova.

Pod garancijom se podrazumijeva obaveza vlasnika podzemnih instalacija, da po pismeno upućenom pozivu općinske službe, o svome trošku, otkloni sve nedostatke u roku od 24 sata , a koje su posljedica loše izvedene sanacije na prokopanoj saobraćajnoj površini.

Nadzor nad izvršavanjem obaveze iz stava 2. ovog člana vrše općinska služba i općinska inspekcija, svaka u okvirima svoje nadležnosti.

III - NAKNADA

Član 21.

Za prokopavanja cesta na području Općine Centar Sarajevo kojim upravlja Općina, vlasnik podzemnih instalacija je dužan plaćati naknadu.

Naknada za prokopavanje cesta se utvrđuje posebnim rješenjem koje donosi općinska služba, a obračunava se u bruto iznosu koji uključuje neto iznos sa obračunatim iznosom PDV-a.

Protiv upravnih akata kojim se utvrđuje naknada za prokopavanja cesta na području Općine Centar Sarajevo, u drugom stepenu rješava nadležni općinski organ utvrđen aktima Općine.

Član 22.

Naknada za prokopavanja cesta na području Općine Centar Sarajevo čiji je upravitelj Općina utvrđuje se u iznosu od 50,00 KM po m² prokopane površine, s tim što minimalna naknada za prokop po izdatom odobrenju ne može biti manja od 200,00 KM.

Naknada za prokopavanje se plaća u cijelom iznosu, prije preuzimanja rješenja.

Član 23.

Prihodi ostvareni po osnovu naplate za prokopavanje, usmjeravat će se za izgradnju i poboljšanje cestovne infrastrukture na području Općine.

Član 24.

Naknada se neće naplaćivati u slučajevima kada se prokopavanje vrši radi hitnih intervencija na opravci i otklanjanju kvarova na postojećim podzemnim instalacijama, kao i u slučajevima, finansiranja radova na prokopavanju iz budžetskih sredstava, od strane Općine u svojstvu investitora.

IV – NADZOR

Član 25.

Nadzor nad primjenom ove Odluke vrši općinska služba.

Član 26.

Inspekcijski nadzor nad provođenje ove Odluke će vršiti nadležna inspekcija Općine Centar.

U vršenju inspekcijskog nadzora, cestovni i komunalni inspektor, u okvirima svoje nadležnosti, ovlašten je za pokretanje prekršajnog postupka protiv počinioca prekršaja, u slučajevima kada se prokopavanje saobraćajnica ne vrši u skladu sa odredbama ove Odluke.

V – KAZNE NE ODREDBE

Član 27.

Novčanom kaznom od 5.000,00 KM do 7.000,00 KM, kaznit će se za prekršaj pravno lice – vlasnik podzemnih instalacija, ako:

- vrši prokopavanje bez odobrenja općinske službe (član 5. ove Odluke),
- u roku od 24 sata ne obavijesti općinsku inspekciju (član 8. ove Odluke),
- se ne pridržava "Tehničkih uslova za prokopavanje i zatvaranje prokopanih javnih površina na području Kantona Sarajevo" i prokopane saobraćajne površine ne dovede u prvobitno i tehnički ispravno stanje (član 9. ove Odluke),
- nastavi sa izvođenjem radova nakon donošenja rješenja o njihovom obustavljanju (član 17. ove Odluke),
- oštećenu saobraćajnu površinu nakon prokopavanja ne dovede u prvobitno i tehnički ispravno stanje (član 12. stav 2. ove Odluke),
- ne preduzme mjere radi otklanjanja neposredne opasnosti po život i zdravlje ljudi, te za susjedne objekte i bezbjednost saobraćaja.

Za prekršaj iz stava 1. ovog člana, kaznit će se odgovorno lice u pravnom licu novčanom kaznom u iznosu od 1.000,00 KM do 2.000,00 KM.

Član 28.

Novčanom kaznom od 5.000,00 KM do 7.000,00 KM, kaznit će se za prekršaj pravno lice – izvođač radova, ako:

- se ne pridržava "Tehničkih uslova za prokopavanje i zatvaranje prokopanih javnih površina na području Kantona Sarajevo" i prokopane saobraćajne površine ne dovede u prvobitno i tehnički ispravno stanje (član 9. ove Odluke),
- ne pribavi odobrenje za izmjenu režima saobraćaja od strane Ministarstva saobraćaja Kantona Sarajevo (član 11. ove Odluke),
- ne preduzme odgovarajuće mjere zaštite prolaznika i ostalih učesnika u saobraćaju, te ne postavi saobraćajnu signalizaciju (član 10. ove Odluke),
- ne preduzme mjere radi otklanjanja neposredne opasnosti po život i zdravlje ljudi, te za susjedne objekte i bezbjednost saobraćaja.

Za prekršaj iz stava 1. ovog člana, kaznit će se odgovorno lice u pravnom licu novčanom kaznom u iznosu od 1.000,00 KM do 2.000,00 KM.

Član 29.

Novčanom kaznom u iznosu od 500,00 KM do 1.000,00 KM, kaznit će se fizičko lice – građanin koji vrši prokopavanje saobraćajnica.

VI – ZAVRŠNE ODREDBE

Član 30.

Na odnose koji nisu regulisani odredbama ove Odluke, primjenjuju se važeći propisi u Kantonu Sarajevo kojima se uređuje oblast prokopavanja .

Član 31.

Ova Odluka stupa na snagu danom objavljivanja na oglasnoj ploči Općine, a naknadno će biti objavljena u "Službenim novinama Kantona Sarajevo".

Broj: 01-19-5350/21

Sarajevo, 30.09.2021. godina

Fredsjedavajući Općinskog vijeća

Đozo Sejad

